

5.

Na osnovu člana 37. stav 1. tačka f) Ustava Zeničko-dobojskog kantona, Skupština Zeničko-dobojskog kantona na 52. sjednici održanoj 28.01.2014. godine donosi

## **ZAKON O DOPUNSKIM PRAVIMA BRANILACA I ČLANOVA NJIHOVIH PORODICA**

### DIO PRVI - OPĆE ODREDBE

#### **Član 1.**

##### **(Predmet Zakona)**

- (1) Ovim Zakonom se uređuju uvjeti, način i postupak za ostvarivanje prava članova porodica šehida, poginulih, umrlih i nestalih branilaca; članova uže porodice poginulih, umrlih ili nestalih dobitnika ratnog priznanja i odlikovanja; dobitnika ratnih priznanja i odlikovanja i članova njihovih porodica; ratnih vojnih invalida i članova njihovih porodica i demobiliziranih branilaca i članova njihovih porodica, kao i druga pitanja iz oblasti zaštite branilaca i članova njihovih porodica, koji imaju prebivalište na području Zeničko-dobojskog kantona (u daljnjem tekstu: Kanton), kao i povratnika u Republiku Srpsku koji ostvaruju osnovna prava iz branilačko-invalidske zaštite u općinama Kantona ili koji su na evidenciji nadležnog organa za vojne evidencije u općinama Kantona.
- (2) Pojam šehid ili pojam poginuli branilac, u smislu ovog Zakona, koristi se po slobodnom izboru korisnika prava.
- (3) Lica iz stava (1) ovog člana prava po ovom Zakonu ostvaruju kao dopunska, uz prava koja su za braniocima i članove njihovih porodica utvrđena Zakonom o pravima branilaca i članova njihovih porodica ("Službene novine Federacije Bosne i Hercegovine" broj 33/04, 56/05, 70/07 i 9/10) i Zakonom o posebnim pravima dobitnika ratnih priznanja i odlikovanja i članova njihovih porodica ("Službene novine Federacije Bosne i Hercegovine" broj 70/05, 61/06 i 9/10).

#### **Član 2.**

##### **(Definicije)**

U skladu sa odredbama zakona iz člana 1. stav (3) ovog Zakona, kod reguliranja prava i pogodnosti koja se tiču branilaca i članova njihovih porodica utvrđenih ovim Zakonom i drugim propisima na području Kantona, koriste se sljedeći pojmovi i definicije:

- a) Braniocem, odnosno demobiliziranim braniocem (u daljnjem tekstu: branilac) smatra se pripadnik Armije Republike Bosne i Hercegovine, Hrvatskog vijeća obrane i policije nadležnog organa unutrašnjih poslova (u daljnjem tekstu: Oružane snage) koji je učestvovao u odbrani Bosne i Hercegovine (početak agresije na općinu Ravno) od 18.09.1991. do 23.12. 1996. godine, odnosno do prestanka neposredne ratne opasnosti i koji je demobiliziran rješenjem nadležnog vojnog organa, kao i lice koje je učestvovalo u pripremi za odbranu i u odbrani Bosne i Hercegovine u periodu prije 18.09.1991. godine a koje je angažirano od nadležnih organa;
- b) Pod učešćem u odbrani Bosne i Hercegovine podrazumijeva se učešće u oružanom otporu i djelovanje u direktnoj vezi sa pružanjem otpora;
- c) Dobrovoljcem i organizatorom otpora smatra se pripadnik vojnih jedinica koji je učestvovao u pripremi za odbranu i u odbrani Bosne i Hercegovine u periodu do 19.06.1992. godine, kao i drugo lice koje nije bilo vojni obveznik u vrijeme dobrovoljnog stupanja u Oružane snage i ostalo neprekidno u jedinicama do kraja rata, ili je ranije demobiliziran od nadležnog vojnog organa;
- d) Veteranom se smatra lice koje je stupilo u Oružane snage od 18.09.1991. godine do 31.12.1992. godine i ostalo neprekidno do 23.12.1995. godine, ili je ranije demobilizirano od nadležnog vojnog organa;
- e) Učesnikom rata smatra se svako lice koje je u sastavu Oružanih snaga provelo najmanje jednu godinu neprekidno u periodu od 20.06.1992. godine do 23.12.1995. godine.

#### **Član 3.**

##### **(Pojmovi korišteni u Zakonu)**

- (1) Ratni vojni invalid, u smislu ovog Zakona, je branilac kojem je to svojstvo utvrđeno rješenjem nadležnog organa u skladu sa Zakonom o pravima branilaca i članova njihovih porodica, a po osnovu zadobivene rane, povrede, bolesti ili pogoršanja zdravstvenog stanja, usljed čega je nastupilo oštećenje njegovog organizma najmanje za 20%.
- (2) Član porodice šehida, poginulog, umrlog, nestalog branioca i umrlog ratnog vojnog invalida, u smislu ovog Zakona, je korisnik prava na porodičnu invalidninu, na osnovu rješenja nadležnog organa izdatog u skladu sa Zakonom o pravima branilaca i članova njihovih porodica.
- (3) Dijete šehida, poginulog, umrlog, nestalog branioca bez oba roditelja, u smislu ovog Zakona, je član poro-

dice šehida, poginulog, umrlog, nestalog branioca, koje je u vrijeme gubitka oba roditelja bilo malodobno.

- (4) Djetetom dobitnika ratnog priznanja ili odlikovanja /ratnog vojnog invalida/ demobiliziranog branioca, u smislu ovog Zakona, smatra se dijete rođeno u braku/van braka, usvojeno dijete, kao i pastorče koje je sa istim živjelo u zajedničkom domaćinstvu najmanje posljednju godinu dana.
- (5) Lice sa naročitim zaslugama u odbrambeno-oslobodilačkom ratu, u smislu ovog Zakona, je dobitnik ratnog priznanja ili odlikovanja i nosilac "Partizanske spomenice 1941".
- (6) Dobitnik ratnog priznanja ili odlikovanja i član uže porodice poginulog, umrlog ili nestalog dobitnika ratnog priznanja ili odlikovanja, u smislu ovog Zakona je korisnik prava na mjesečni novčani dodatak, na osnovu rješenja nadležnog organa, u skladu sa odredbama Zakona o posebnim pravima dobitnika ratnih priznanja i odlikovanja i članova njihovih porodica.
- (7) Nosilac "Partizanske spomenice 1941" i član uže porodice poginulog ili umrlog nosioca "Partizanske spomenice 1941", u smislu ovog Zakona je korisnik prava na mjesečni novčani dodatak, na osnovu rješenja nadležnog organa, u skladu sa odredbama Odluke o posebnim pravima nosilaca "Partizanske spomenice 1941" i članova njihovih porodica ("Službene novine Federacije Bosne i Hercegovine" broj 6/06).
- (8) Sa braniocima, u smislu ovog Zakona, izjednačeni su u pravima učesnici narodnooslobodilačkog-antifašističkog rata 1941.-1945. godine, čiji je status utvrđen rješenjem nadležnog organa.

#### Član 4.

##### (Posebni korisnici prava po Zakonu)

Prava po ovom Zakonu, na način i pod uvjetima utvrđenim podzakonskim aktima, može koristiti i:

- a) dijete šehida, poginulog, umrlog, nestalog branioca, kojem je prestalo pravo na porodičnu invalidninu – prava iz članova 6., 15. – 17. i 23. ovog Zakona, do navršene 35. godine života;
- b) dijete poginulog, umrlog ili nestalog dobitnika ratnog priznanja ili odlikovanja, osim lica iz tačke a) ovog člana, kojem je prestalo pravo na mjesečni novčani dodatak i dijete umrlog ratnog vojnog invalida koje nije korisnik prava na porodičnu invalidninu - prava iz članova 6.,16.,17. i 23. ovog Zakona, do navršene 30. godine života;
- c) dijete umrlog demobiliziranog branioca koji je u redovima Oružanih snaga proveo najmanje dvije

godine i koje je sa istim živjelo u zajedničkom domaćinstvu ili ga je isti izdržavao najmanje posljednju godinu dana prije smrti - prava iz člana 6.,16.,17. i 23. ovog Zakona, do navršene 30. godine života;

- d) udovica umrlog demobiliziranog branioca koji je u redovima Oružanih snaga proveo najmanje dvije godine, i koja je sa istim živjela u braku najmanje dvije posljednje godine dana prije smrti, pod uvjetom da nema druge prihode i da nije stupila u brak ili vanbračnu zajednicu;
- e) roditelji umrlog ratnog vojnog invalida ili demobiliziranog branioca koji je u redovima Oružanih snaga proveo najmanje dvije godine, ukoliko ih je isti izdržavao posljednjih godinu dana prije smrti.

## DIO DRUGI - PRAVA

### Član 5.

#### (Dopunska prava po Zakonu)

Branioци i članovi njihovih porodica, u skladu sa ovim Zakonom, ostvaruju slijedeća prava:

- a) Zdravstvena zaštita;
- b) Banjsko i klimatsko liječenje (medicinska rehabilitacija);
- c) Profesionalna rehabilitacija;
- d) Osiguranje povoljnijih uvjeta za zapošljavanje;
- e) Vanredna novčana pomoć;
- f) Prednosti u školovanju i stipendiranju;
- g) Rješavanje stambenog pitanja;
- h) Oslobođanje od plaćanja sudskih i administrativnih taksi;
- i) Sufinansiranje invalidskog sporta i obilježavanja značajnih datuma
- j) Podizanje nišana – nadgrobnog spomenika;
- k) Pomoć u slučaju smrti;
- l) Izgradnja prilaza do stambene zgrade;
- m) Posebna prava.

## POGLAVLJE I. ZDRAVSTVENA ZAŠTITA

### Član 6.

#### (Ostvarivanje prava)

- (1) Branioци i članovi njihovih porodica ostvaruju pravo

na zdravstvenu zaštitu iz obaveznog zdravstvenog osiguranja, saglasno odredbama Zakona o zdravstvenoj zaštiti ("Službene novine Federacije BiH" broj 46/10 i 75/13) i Zakona o zdravstvenom osiguranju ("Službene novine Federacije BiH" broj 30/97, 7/02, 70/08 i 48/11) ukoliko to pravo ne mogu ostvariti po drugom osnovu.

- (2) Ostvarivanje zdravstvene zaštite za lica koja nisu osigurana u skladu sa stavom (1) ovog člana, kao i prošireni obim prava iz oblasti zdravstvene zaštite branilaca i članova njihovih porodica, posebnim propisom utvrđuje Skupština Zeničko-dobojskog kantona.
- (3) Propisom iz prethodnog stava naročito se reguliše pitanje nabavke ortopedskih i drugih pomagala i njihova opravka, te osiguranje potrebnih lijekova i sanitetskog materijala za liječenje rana i povreda, posljedično vezanih za učešće u ratu.

#### **Član 7.**

##### **(Prednost u korištenju usluga zdravstvenih ustanova)**

Nadležni organi u ustanovama iz oblasti zdravstva osigurati će isticanje obavijesti na vidnim mjestima da prednost bez čekanja u redu imaju dobitnici ratnih priznanja ili odlikovanja, nosioci "Partizanske spomenice 1941", ratni vojni invalidi, članovi porodice šehida, poginulog, umrlog, nestalog branioaca, članovi uže porodice poginulog, umrlog ili nestalog dobitnika ratnog priznanja ili odlikovanja i članovi uže porodice poginulog ili umrlog nosioca "Partizanske spomenice 1941", koji će svoj status dokazivati odgovarajućim iskaznicama.

#### **Član 8.**

##### **(Pravo na liječenje u inozemstvu)**

- (1) Ratni vojni invalidi, dobitnici ratnih priznanja ili odlikovanja, demobilizirani branioци, nosioci "Partizanske spomenice 1941", članovi porodica šehida, poginulih, umrlih, nestalih branilaca, članovi uže porodice poginulog, umrlog ili nestalog dobitnika ratnog priznanja ili odlikovanja, djeca dobitnika ratnih priznanja ili odlikovanja, djeca ratnih vojnih invalida i djeca demobiliziranih branilaca, ostvaruju pravo na liječenje u inozemstvu prema utvrđenoj medicinskoj indikaciji i u skladu sa Zakonom o zdravstvenom osiguranju i propisom o upućivanju osiguranih lica na liječenje u inozemstvo.
- (2) Način i postupak ostvarivanja ovog prava, u skladu sa federalnim propisima koji regulišu ovu oblast, posebnim propisom utvrđuje Vlada Zeničko-dobojskog kantona (u daljnjem tekstu: Vlada Kantona).

## **POGLAVLJE II. BANJSKO I KLIMATSKO LIJEČENJE (MEDICINSKA REHABILITACIJA)**

#### **Član 9.**

##### **(Korisnici prava)**

- (1) Ratni vojni invalid, dobitnik ratnog priznanja ili odlikovanja, demobilizirani branilac, nosilac "Partizanske spomenice 1941", član porodice šehida, poginulog, umrlog, nestalog branioaca i član uže porodice poginulog, umrlog ili nestalog dobitnika ratnog priznanja ili odlikovanja, ima pravo na medicinsku rehabilitaciju u banjско-klimatskom lječilištu, ukoliko je prema medicinskim indikacijama takvo liječenje potrebno.
- (2) Izuzetno, na medicinsku rehabilitaciju može biti upućen i član invalidskog sportskog kluba i reprezentacije u invalidskom sportu, kao i pojedinac RVI-sportista, u pripremanju za takmičenja.

#### **Član 10.**

##### **(Sadržina prava)**

Banjско-klimatsko liječenje, prema ovom zakonu, podrazumijeva liječenje koje je neophodno kao nastavak liječenja od posljedica ranjavanja, povređivanja i bolesti koje su propisane kao indikacije za to liječenje, a koje se obavlja u specijalizovanim zdravstvenim ustanovama u kojima se u liječenju primjenjuje i prirodni faktor, drugim zdravstvenim ustanovama u kojima se liječenje obavlja pretežno prirodnim faktorom, kao i u ustanovama i privrednim društvima osnovanim za liječenje, odmor i rekreaciju u kojima se u liječenju primjenjuje prirodni faktor.

#### **Član 11.**

##### **(Regulisanje pružanja usluga)**

Sa ustanovama iz člana 10. ovog Zakona, Ministarstvo za boračka pitanja Zeničko-dobojskog kantona (u daljnjem tekstu: Ministarstvo) zaključuje ugovore o banjско-klimatskom liječenju i rehabilitaciji, kojima se naročito regulišu pitanja u pogledu obima, kvaliteta i cijene pružanja zdravstvenih i drugih usluga, kao i druga međusobna prava i obaveze.

#### **Član 12.**

##### **(Ostvarivanje prava)**

- (1) Vlada Kantona će posebnim propisom utvrditi uvjete, način i postupak upućivanja pripadnika branilačke populacije na medicinsku rehabilitaciju u banjско-klimatska lječilišta, kao i ostala pitanja od značaja za ostvarivanje ovog prava.
- (2) Propisom iz prethodnog stava za dobitnike ratnog priznanja ili odlikovanja i nosioce "Partizanske

spomenice 1941", osigurat će se ostvarivanje prava u obimu koji je propisan za ratne vojne invalide.

### POGLAVLJE III. PROFESIONALNA REHABILITACIJA

#### Član 13. (Korisnici prava)

- (1) Ratni vojni invalid, dobitnik ratnog priznanja ili odlikovanja i demobilizirani branilac, na osnovu preostale radne sposobnosti, ima pravo na profesionalnu rehabilitaciju uključujući prekvalifikaciju i školovanje za obavljanje poslova za koje se traži više stručna sprema od one koju ima, pod uvjetom da je nezaposlen i ako prema općem obrazovanju, godinama života, zdravstvenom stanju i drugim okolnostima ima uvjete za uspješnu rehabilitaciju.
- (2) Profesionalnom rehabilitacijom osigurava se osposobljavanje za vršenje ranijeg ili drugog odgovarajućeg zanimanja, stručno osposobljavanje za vršenje određenog zanimanja i stručno usavršavanje.

#### Član 14. (Ostvarivanje prava)

- (1) Pravo na profesionalnu rehabilitaciju se utvrđuje na osnovu pribavljenog nalaza, ocjene i mišljenja komisije stručne ustanove za ocjenjivanje radne sposobnosti, u skladu sa propisima iz oblasti penzijsko-invalidskog osiguranja.
- (2) Uvjete, način i postupak za ostvarivanje prava na profesionalnu rehabilitaciju na osnovu preostale radne sposobnosti, propisuje posebnim pravilnikom ministar Ministarstva.

### POGLAVLJE IV. OSIGURANJE POVOLJNIJIH UVJETA ZA ZAPOŠLJAVANJE

#### Član 15. (Prednost pri zapošljavanju)

- (1) Ratni vojni invalid, demobilizirani branilac i član porodice šehida, poginulog, umrlog, nestalog branioca koji je na evidenciji Službe za zapošljavanje Kantona, ostvaruje pravo na prednost pri zapošljavanju, pod jednakim uvjetima i u skladu sa propisima iz oblasti radnog zakonodavstva.
- (2) Pravo iz stava (1) ovog člana ne može ostvariti lice kojem je radni odnos, zasnovan po osnovu ranije ostvarene prednosti pri zapošljavanju, prestao njegovom krivicom ili je po prestanku radnog odnosa ostvario pravo na otpremninu.

#### Član 16. (Prednost pri korištenju programa Službe za zapošljavanje)

Ratni vojni invalid, demobilizirani branilac i član porodice šehida, poginulog, umrlog, nestalog branioca koji je na evidenciji Službe za zapošljavanje Kantona, ima prednost pri korištenju programa iste Službe, namijenjenog trajnom zapošljavanju.

#### Član 17. (Dodjela kredita za zapošljavanje)

- (1) U cilju otvaranja novih radnih mjesta namijenjenih zapošljavanju branilaca i članova njihovih porodica, mogu se dodijeliti kreditna sredstava.
- (2) Vlada Kantona će posebnim propisom utvrditi visinu novčanih sredstava za kreditiranje zapošljavanja, kriterije, način i postupak dodjele istih, kao i ostala pitanja od značaja za ostvarivanje ovog prava.

### POGLAVLJE V. VANREDNA NOVČANA POMOĆ

#### Član 18. (Novčana pomoć zbog vanrednih okolnosti)

Braniocima i članovima njihovih porodica, u slučaju vanrednih okolnosti kao što su elementarne nepogode i nesreće, smrt i bolest člana kućnog domaćinstva i u drugim slučajevima koji uzrokuju tešku ekonomsku situaciju, može se odobriti vanredna novčana pomoć u svrhu osiguranja sredstava za osnovne potrebe.

#### Član 19. (Uvjeti)

Vlada Kantona će posebnim propisom utvrditi visinu novčanih sredstava koja mogu biti odobrena u svrhu vanredne novčane pomoći, uvjete, način i postupak dodjele istih, kao i ostala pitanja od značaja za ostvarivanje ovog prava.

### POGLAVLJE VI. PREDNOSTI U ŠKOLOVANJU I STIPENDIRANJU

#### Član 20. (Prednost pri upisu u obrazovne ustanove)

- (1) Dobitnik ratnog priznanja ili odlikovanja, ratni vojni invalid, demobilizirani branilac, dijete šehida, poginulog, umrlog, nestalog branioca, dijete dobitnika ratnog priznanja ili odlikovanja, dijete ratnog vojnog invalida i dijete demobiliziranog branioca, koji je redovni učenik i student, ima pravo prvenstva pod

jednakim uvjetima pri upisu u obrazovnu ustanovu čiji je osnivač Kanton ili općina, odnosno smještaju u đački i studentski dom na području Kantona.

- (2) Vlada Kantona će posebnim propisom utvrditi uvjete, način i postupak realizacije prava iz ovog člana.

#### **Član 21. (Besplatan upis)**

Lice iz člana 20. ovog Zakona, ima pravo na besplatan upis u novu školsku/studijsku godinu u srednjoškolskoj i visokoškolskoj ustanovi čiji je osnivač Kanton ili općina, u skladu sa uvjetima utvrđenim posebnim propisom koji donosi Vlada Kantona.

#### **Član 22. (Besplatni obavezni udžbenici)**

Djeca dobitnika ratnih priznanja ili odlikovanja, ratnih vojnih invalida i demobiliziranih branilaca, imaju pravo na besplatne obavezne udžbenike za potrebe redovnog školovanja u osnovnim i srednjim školama, u skladu sa uvjetima utvrđenim posebnim propisom koji donosi Vlada Kantona.

#### **Član 23. (Stipendiranje studija)**

Branioци i članovi njihovih porodica, koji su srednje obrazovanje stekli u školama na području Bosne i Hercegovine, imaju pravo na dodjelu stipendije za redovni studij na visokoškolskim ustanovama, u skladu sa posebnim propisom koji donosi Vlada Kantona, a kojim se naročito utvrđuje visina novčanih sredstava za stipendiranje, uvjeti, način i postupak dodjele stipendija, kao i ostala pitanja od značaja za ostvarivanje ovog prava.

### **POGLAVLJE VII. RJEŠAVANJE STAMBENOG PITANJA**

#### **Član 24. (Jednokratna novčana sredstva)**

Dobitnik ratnog priznanja ili odlikovanja, ratni vojni invalid, demobiliziran branilac koji je u redovima Oružanih snaga proveo najmanje dvije godine, član porodice šehida, poginulog, umrlog, nestalog branioца i član uže porodice poginulog, umrlog ili nestalog dobitnika ratnog priznanja ili odlikovanja, koji nema riješeno stambeno pitanje, a sa prebivalištem odnosno boravištem na području Kantona je u trajanju od najmanje tri godine neprekidno, ima pravo na jednokratnu bespovratnu dodjelu novčanih sredstava za rješavanje stambenih potreba.

#### **Član 25. (Prioritetno rješavanje stambenih pitanja)**

U skladu sa važećim propisima, Vlada Kantona osigurava prioritetno rješavanje stambenih pitanja pripadnika branilačke populacije putem stambenog zbrinjavanja i pomoći u stambenom zbrinjavanju, po pravu prvenstva kako slijedi:

- a) dobitnici ratnih priznanja ili odlikovanja;
- b) djeca šehida, poginulih, umrlih, nestalih branilaca bez oba roditelja i ratni vojni invalidi sa oštećenjem organizma od 100% I grupe;
- c) porodice sa dva i više šehida, poginulih, umrlih, nestalih branilaca i ratni vojni invalidi sa oštećenjem organizma od 100% II grupe;
- d) porodice šehida, poginulih, umrlih, nestalih branilaca i ratni vojni invalidi sa oštećenjem organizma od 90%, 80% i 70%;
- e) članovi uže porodice poginulih, umrlih ili nestalih dobitnika ratnih priznanja ili odlikovanja;
- f) ostali ratni vojni invalidi i demobilizirani branioци.

#### **Član 26. (Stambeno zbrinjavanje povratnika u RS i raseljenih lica)**

- (1) Lice iz člana 24. ovog Zakona, koje ima status povratnika u RS ili raseljenog lica, u svrhu osiguranja uvjeta za održivi povratak u mjesto u kojem je imalo prebivalište ili boravište prije početka agresije na Republiku Bosnu i Hercegovinu, može ostvariti pravo na jednokratnu dodjelu sredstava za stambeno zbrinjavanje.
- (2) Pravo iz stava (1) ovog člana nema lice koje je na području Kantona riješilo svoje stambeno pitanje.

#### **Član 27. (Ostvarivanje prava)**

Vlada Kantona će posebnim propisom utvrditi visinu novčanih sredstava namijenjenih trajnom stambenom zbrinjavanju branilaca i članova njihovih porodica, uvjete, način i postupak dodjele istih, kao i ostala pitanja od značaja za ostvarivanje ovog prava.

### **POGLAVLJE VIII. OSLOBAĐANJE OD PLAĆANJA SUDSKIH I ADMINISTRATIVNIH TAKSI**

#### **Član 28. (Korisnici prava)**

Dobitnik ratnog priznanja ili odlikovanja, ratni vojni

invalid, član porodice šehida, poginulog, umrlog, nestalog branioca, član uže porodice poginulog, umrlog ili nestalog dobitnika ratnog priznanja ili odlikovanja i nezaposleni demobilizirani branilac, oslobođen je plaćanja taksi u postupku pred sudovima u Kantonu, kantonalnih i općinskih administrativnih taksi.

**Član 29.**  
**(Posebni slučajevi oslobađanja)**

Dobitnik ratnog priznanja ili odlikovanja, ratni vojni invalid, demobilizirani branilac, član porodice šehida, poginulog, umrlog, nestalog branioca, dijete dobitnika ratnog priznanja ili odlikovanja, dijete ratnog vojnog invalida i dijete demobiliziranog branioca, u postupku pribavljanja dokumentacije u cilju stipendiranja i pomoći u školovanju, kao prava predviđenih ovim zakonom, oslobođen je plaćanja kantonalnih i općinskih administrativnih taksi i naknada za sva uvjerenja potrebna u tu svrhu, izdata u školskim ustanovama, čiji je osnivač Kanton.

**POGLAVLJE IX. SUFINANSIRANJE INVALIDSKOG SPORTA I OBILJEŽAVANJA ZNAČAJNIH DATUMA**

**Član 30.**  
**(Sufinansiranje sportskih aktivnosti)**

- (1) Invalidski sportski savez i invalidski sportski klub, čiji sastav pretežno čine ratni vojni invalidi sa područja Kantona, ostvaruje pravo na sufinansiranje troškova učešća u sportskim takmičenjima i manifestacijama, odnosno u organizovanju i održavanju sportsko-rekreacionih takmičenja i aktivnosti, te manifestacija u sportu i rekreaciji invalidnih lica.
- (2) Pravo na finansijsku pomoć za takmičarske aktivnosti može ostvariti i ratni vojni invalid -sportista pojedinac.
- (3) Vlada Kantona će posebnim propisom utvrditi visinu novčanih sredstava namijenjenih ostvarivanju ovog prava, uvjete, način i postupak dodjele istih.

**Član 31.**  
**(Sufinansiranje obilježavanja značajnih datuma)**

Vlada Kantona, na prijedlog Ministarstva, odobrava kantonalnom udruženju pripadnika branilačke populacije sufinansiranje troškova organizovanja i održavanja manifestacije povodom obilježavanja značajnog datuma i događaja iz proteklog odbrambeno-oslobodilačkog rata.

**Član 32.**  
**(Sredstva za rad branilačkih udruženja)**

Vlada Kantona odobrava sredstva za rad i aktivnosti

kantonalnih udruženja pripadnika branilačke populacije od posebnog društvenog interesa, u skladu sa posebnim propisom kojim utvrđuje visinu, uvjete, način i postupak dodjele istih sredstava.

**POGLAVLJE X. PODIZANJE NIŠANA–  
NADGROBNOG SPOMENIKA**

**Član 33.**  
**(Jedinstveno spomen obilježje šehida/poginulog branioca)**

Svakom pripadniku Oružanih snaga RBiH koji je poginuo ili umro kao učesnik u odbrani Bosne i Hercegovine u proteklom odbrambeno-oslobodilačkom ratu i koji je sahranjen na području Kantona, osigurava se podizanje jedinstvenog spomen obilježja, izrađenog u skladu sa usvojenim idejnim rješenjem.

**Član 34.**  
**(Spomen obilježja za branioce ukopane izvan Kantona)**

Vlada Kantona, na prijedlog Ministarstva, posebnim aktom odobrava podizanje nišana – nadgrobnog spomenika i za poginule pripadnike Oružanih snaga RBiH koji su ukopani izvan područja Kantona, a koji su početkom agresije na Bosnu i Hercegovinu imali prebivalište na području Kantona.

**Član 35.**  
**(Naknada troškova podizanja nišana/nadgrobnog spomenika)**

- (1) Član porodice šehida, poginulog, umrlog ili nestalog branioca ili drugo lice koje vlastitim sredstvima izvrši podizanje nišana - nadgrobnog spomenika šehidu/poginulom braniocu iz člana 33. i 34. ovog Zakona, ima pravo na naknadu troškova u visini jedne i po prosječne neto plaće isplaćene u Federaciji Bosne i Hercegovine u prethodnoj godini.
- (2) Vlada Kantona će posebnim propisom utvrditi uvjete, način i postupak realizacije prava iz stava (1) ovog člana.

**Član 36.**  
**(Spomen obilježje dobitnika ratnog priznanja ili odlikovanja)**

- (1) U slučaju smrti dobitnika ratnog priznanja "Zlatni ljiljan", "Red hrvatskog trolista" i nosioca "Partizanske spomenice 1941", osiguravaju se sredstva u svrhu naknade troškova podizanja nišana/nadgrobnog spomenika, u visini dvije prosječne neto plaće

isplaćene u Federaciji Bosne i Hercegovine u prethodnoj godini.

- (2) U slučaju smrti ostalih dobitnika ratnog priznanja ili odlikovanja osiguravaju se sredstva u svrhu naknade troškova podizanja nišana/nadgrobnog spomenika, u visini jedne prosječne neto plaće isplaćene u Federaciji Bosne i Hercegovine u prethodnoj godini.
- (3) Pravo na naplatu sredstava iz stava (1) i (2) ovog člana, pripada članu porodice, odnosno drugom fizičkom ili pravnom licu koje izvrši podizanje nišana/nadgrobnog spomenika umrlom braniocu.
- (4) Odluku o naknadi troškova podizanja spomen obilježja iz ovog člana, a na osnovu podnesenog zahtjeva i dokaza u tom smislu, donosi ministar Ministarstva.

## POGLAVLJE XI. POMOĆ U SLUČAJU SMRTI

### Član 37.

#### (Naknada troškova dženaze/sahrane)

- (1) U slučaju smrti dobitnika ratnog priznanja ili odlikovanja i nosioca "Partizanske spomenice 1941", članovi porodice sa kojima je umrla živio u zajedničkom domaćinstvu u vrijeme smrti ili drugo lice koje vlastitim sredstvima sahrani umrlog, imaju pravo na jednokratnu pomoć najmanje u visini jedne i pol prosječne neto plaće isplaćene u Federaciji Bosne i Hercegovine u prethodnoj godini, prema podacima Zavoda za statistiku Federacije Bosne i Hercegovine, ukoliko to pravo nisu ostvarili prema drugom propisu.
- (2) U slučaju smrti ratnog vojnog invalida i demobiliziranog branioca, članovi porodice sa kojima je umrla živio u zajedničkom domaćinstvu u vrijeme smrti ili drugo lice koje vlastitim sredstvima sahrani umrlog, imaju pravo na jednokratnu pomoć najmanje u visini prosječne neto plaće isplaćene u Federaciji Bosne i Hercegovine u prethodnoj godini, prema podacima Zavoda za statistiku Federacije Bosne i Hercegovine, ukoliko to pravo nisu ostvarili prema drugom propisu.
- (3) U slučaju smrti člana porodice šehida, poginulog, umrlog, nestalog branioca i člana uže porodice poginulog, umrlog ili nestalog dobitnika ratnog priznanja ili odlikovanja, koji je prije smrti sa prebivalištem odnosno boravištem na području Kantona bio u trajanju od najmanje dvije godine neprekidno, član porodice ili drugo lice koje vlastitim sredstvima sahrani umrlog ima pravo na novčanu pomoć u svrhu naknade troškova dženaze - sahrane (troškovi prijevoza i prijenosa umrlog lica, opremanja i

ukopa) u iznosu jedne polovine prosječne neto plaće isplaćene u Federaciji Bosne i Hercegovine u prethodnoj godini, ukoliko istu pomoć ne može ostvariti po osnovu Federalnog zakona ili na drugi način.

- (4) Izuzetno, pomoć iz stava (3) ovog člana se može odobriti i u većem iznosu, ukoliko se član porodice koji sahranjuje umrlog nalazi u teškoj socijalno-ekonomskoj situaciji.
- (5) Vlada Kantona će posebnim propisom utvrditi način i postupak dodjele ovih sredstava, dokumentaciju koju je korisnik prava dužan podnijeti, kao i ostala pitanja od značaja za ostvarivanje ovog prava.

### Član 38.

#### (Prava u slučaju smrti lica sa naročitim zaslugama)

- (1) U slučaju smrti lica sa naročitim zaslugama u odbrambeno-oslobodilačkom ratu, općina na području koje je isti imao prebivalište vrši obavještanje o smrti putem javnih medija.
- (2) U slučaju smrti dobitnika ratnog priznanja "Zlatni ljiljan" i "Red hrvatskog trolista" i nosioca "Partizanske spomenice 1941", općina na području koje je isti imao prebivalište, u saradnji sa Kantonalnim udruženjem dobitnika ratnih priznanja i odlikovanja, organizuje ukop - sahranu uz državne počasti.
- (3) Općine na području Zeničko-dobojskog kantona poduzet će aktivnosti na određivanju i uređenju lokacija za ukop - sahranu lica sa naročitim zaslugama.

## POGLAVLJE XII. IZGRADNJA PRILAZA DO STAMBENE ZGRADE

### Član 39.

#### (Korisnik prava)

Ratni vojni invalid I grupe koji nije sposoban za kretanje bez invalidskih kolica, ima pravo na uklanjanje arhitektonsko-urbanističkih barijera za prilaz i ulazak u stambenu zgradu u kojoj stanuje i za korištenje stana.

### Član 40.

#### (Uvjeti za ostvarivanje)

- (1) Pravo iz člana 39. ovog Zakona se može ostvariti jednokratno i pod uvjetom da se radi o stambenoj jedinici sa riješenim imovinsko-pravnim odnosima.
- (2) Realizaciju ovog prava dužna je osigurati općina na području koje se stambena zgrada nalazi.

## POGLAVLJE XIII. POSEBNA PRAVA

**Član 41.****(Posebna prava lica sa naročitim zaslugama)**

- (1) Pod uvjetom da prebivalište odnosno boravište na području Kantona ima neprekidno najmanje tri godine prije stupanja na snagu ovog Zakona, dobitnik ratnog priznanja ili odlikovanja i nosilac "Partizanske spomenice 1941" ima pravo na jednokratno novčano primanje u toku jedne kalendarske godine, u visini koju utvrdi Vlada Kantona, a prema dinamici isplate koju utvrdi Ministarstvo.
- (2) Pod uvjetom iz prethodnog stava, dobitniku ratnog priznanja ili odlikovanja za vrijeme nezaposlenosti odobrava se mjesečna novčana naknada u skladu sa posebnim propisom koji donosi Vlada Kantona, a kojim se naročito utvrđuje visina novčanih sredstava u ovu svrhu, uvjeti, način i postupak dodjele istih, kao i ostala pitanja od značaja za ostvarivanje ovog prava.
- (3) U realizaciji prava na osiguranje povoljnijih uvjeta za zapošljavanje (Poglavlje IV. članovi 15. do 17.) i prednosti u školovanju i stipendiranju (Poglavlje VI. članovi 20. do 23.) iz ovog Zakona, prednost u okviru branilačke kategorije kojoj pripada (ratni vojni invalid, demobilizirani branilac, član porodice šehida, poginulog, umrlog, nestalog branioca) ima dobitnik ratnog priznanja ili odlikovanja odnosno član porodice poginulog, umrlog, nestalog branioca - dobitnika ratnog priznanja ili odlikovanja.

**Član 42.****(Prednost u korištenju usluga državnih organa i javnih ustanova)**

Članovi porodice šehida poginulih, umrlih, nestalih branilaca, ratni vojni invalidi, dobitnici ratnih priznanja ili odlikovanja i nosioci "Partizanske spomenice 1941", imaju prioritet u korištenju usluga državnih organa i javnih ustanova na području Kantona odnosno općina, o čemu su nadležni organi u istim pravnim licima dužni istaknuti obavijest na vidnim mjestima.

## DIO TREĆI - OSTVARIVANJE PRAVA

**Član 43.****(Izuzeci i ograničenja u korištenju prava)**

- (1) Prava utvrđena ovim Zakonom ne mogu koristiti lica kojima je ostvarenje istih omogućeno po drugom pravnom osnovu.
- (2) Prava utvrđena ovim Zakonom se mogu koristiti za period dok postoje propisani uvjeti za njihovo koriš-

tenje i ne mogu se nasljeđivati niti prenositi na druga lica.

**Član 44.****(Lica koja ne mogu ostvariti prava)**

Prava prema ovom Zakonu, ne mogu ostvariti:

- a) lica koja su samovoljno, bez odobrenja nadležne komande napustila Oružane snage (dezertirala);
- b) lica koja su se sama ranila ili povrijedila radi izbjegavanja vojne dužnosti za ciljeve odbrane i sigurnosti Bosne i Hercegovine;
- c) lica koja su osuđena pravosnažnom sudskom presudom zbog izvršenja težih krivičnih djela protiv ustavnog poretka Bosne i Hercegovine, ustavnog poretka Federacije Bosne i Hercegovine, krivičnih djela protiv čovječnosti i međunarodnog prava i krivičnih djela protiv Oružanih snaga;
- d) članovi porodice lica koja su osuđena za djela iz tački a), b) i c) ovog člana.

**Član 45.****(Prestanak prava)**

- (1) Prestanak svojstva dobitnika ratnog priznanja ili odlikovanja, ratnog vojnog invalida ili člana porodice šehida, poginulog, umrlog, nestalog branioca, uže porodice poginulog, umrlog ili nestalog dobitnika ratnog priznanja ili odlikovanja i porodice umrlog ratnog vojnog invalida (korisnika prava na ličnu, odnosno porodičnu invalidninu ili mjesečni novčani dodatak) u skladu sa federalnim propisima iz oblasti branilačko-invalidske zaštite, ima za posljedicu prestanak prava utvrđenih ovim Zakonom, ukoliko su ta prava ostvarena na osnovu tog svojstva i ukoliko ovim Zakonom nije drugačije rečeno.
- (2) Korisnik prava po ovom Zakonu je dužan u roku od 15 dana prijaviti svaku promjenu koja povlači izmjenu ili gubitak prava utvrđenih ovim Zakonom.

**Član 46.****(Dokazivanje statusa)**

U postupku ostvarivanja prava po ovom Zakonu, branioci i članovi njihovih porodica svoj status dokazuju rješenjem nadležne općinske službe o priznavanju svojstva dobitnika ratnog priznanja ili odlikovanja i ratnog vojnog invalida odnosno člana porodice šehida, poginulog, umrlog, nestalog branioca i člana uže porodice poginulog, umrlog ili nestalog dobitnika ratnog priznanja ili odlikovanja, ili uvjerenjem nadležnog organa, izdatog u skladu sa Zakonom o upravnom postupku ("Službene novine FBiH" broj 2/98 i 48/99).



## DIO ČETVRTI - PROVOĐENJE ZAKONA

**Član 47.****(Rješavanje o pravima u prvostepenom postupku)**

- (1) Nadležna općinska služba, prema mjestu prebivališta podnosioca zahtjeva, rješava u prvom stepenu o pravima iz ovog Zakona.
- (2) Službenu evidenciju o korisnicima prava po ovom Zakonu vode nadležne općinske službe.

**Član 48.****(Rješavanje o pravima u drugostepenom postupku)**

- (1) Žalba na prvostepeno rješenje može se uložiti u roku od 8 dana od dana prijema rješenja.
- (2) Po žalbi izjavljenoj na prvostepeno rješenje rješava Ministarstvo.
- (3) Protiv rješenja donesenog po žalbi može se pokrenuti upravni spor.

**Član 49.****(Primjena odredbi Zakona o upravnom postupku)**

U postupku za ostvarivanje prava prema ovom Zakonu primjenjuju se odredbe Zakona o upravnom postupku.

**Član 50.****(Izuzeci u primjeni odredbi)**

Odredbe iz člana 47. do 49. ovog Zakona o nadležnosti i postupku za ostvarivanje prava, ne primjenjuju se u slučajevima u kojima je Zakonom ili propisom donesenim u izvršenju istog drugačije regulirano.

## DIO PETI - NAKNADA ŠTETE

**Član 51.****(Obaveza povrata dodijeljenih sredstava)**

Lice kome je isplaćeno novčano primanje prema ovom Zakonu, na koje nije imalo pravo, dužno je vratiti primljeni iznos:

- a) ako je na osnovu netačnih podataka koje je znalo ili je moralo znati da su netačni, ili je na drugi protivpravni način ostvarilo novčano primanje prema ovom Zakonu, koje mu ne pripada, ili je ostvarilo novčano primanje u većem iznosu nego što mu pripada;
- b) ako je ostvarilo novčano primanje zbog toga što nije prijavilo nastale promjene koje utiču na gubitak, prestanak ili smanjenje obima nekog prava, a znalo je ili je moralo znati za te promjene;

- c) ako je primilo veći iznos od iznosa koje mu je određeno rješenjem.

**Član 52.****(Zastara rokova potraživanja)**

- (1) Potraživanje iz člana 51. ovog Zakona zastarjeva protekom roka određenog zakonom kojim se uređuje zastarjelost potraživanja za odnosnu vrstu potraživanja. Ovi rokovi počinju teći od dana konačnosti rješenja kojim je utvrđeno da isplaćeno primanje ne pripada ili pripada u manjem obimu, odnosno od dana kada je izvršena nepravilna isplata.
- (2) Obaveza vraćanja nepravilno isplaćenog iznosa postoji bez obzira na to da li je rješenje kojim je tom licu pravo priznato, poništeno ili ukinuto.
- (3) Ukoliko je nepravilna isplata nastala kao posljedica greške organa koji je vodio postupak, isti organ je dužan nadoknaditi nepravilno isplaćena sredstva.

## DIO ŠESTI - SREDSTVA ZA OSTVARIVANJE PRAVA

**Član 53.****(Osiguravanje sredstava za provođenje Zakona)**

- (1) Sredstva za finansiranje prava propisanih ovim Zakonom se osiguravaju u budžetu Kantona i općina.
- (2) Sredstva iz stava (1) ovog člana, koja se odnose na budžet Kantona, planiraju se u iznosu od najmanje 4% redovnih budžetskih sredstava.

**Član 54.****(Troškovi postupka)**

- (1) Troškove postupka u vezi sa ostvarivanjem prava prema ovom Zakonu, snosi organ koji vodi postupak.
- (2) U postupku za ostvarivanje prava po ovom Zakonu ne plaća se taksa.
- (3) Na novčana primanja prema ovom Zakonu, ne plaćaju se porezi i doprinosi.

## DIO SEDMI - PRIJELAZNE I ZAVRŠNE ODREDBE

**Član 55.****(Nadzor nad provođenjem Zakona)**

- (1) Nadzor nad provođenjem ovog Zakona i propisa donesenih na osnovu njega, te neposredan upravni i finansijski nadzor i kontrolu trošenja sredstava namijenjenih za ostvarivanje prava po ovom Zakonu, vrši Ministarstvo.

(2) U izvršavanju svojih obaveza iz stava (1) ovog člana, Ministarstvo kao kontrolor u smislu odredbi Zakona o zaštiti ličnih podataka ("Službeni glasnik Bosne i Hercegovine" broj 49/06, 76/11 i 89/11) vrši obradu ličnih podataka neophodnih za utvrđivanje identiteta podnosioca zahtjeva za korištenje prava po Zakonu, uključivo jedinstveni matični broj građana.

(3) U skladu sa odredbama važećih propisa iz iste oblasti, Ministarstvo može putem web stranice Kantona izvršiti objavljivanje informacija koje se odnose na korisnike prava i odobravanje novčanih sredstava sa transfera Ministarstva u svrhu ostvarenja prava po ovom Zakonu.

#### **Član 56.**

##### **(Donošenje provedbenih propisa)**

- (1) Nadležni organi Kantona u smislu ovog Zakona dužni su donijeti provedbene propise za primjenu Zakona u roku od 90 dana od dana stupanja na snagu istog.
- (2) Nadležni organi Kantona i općine u smislu ovog Zakona, dužni su usaglasiti odredbe važećih propisa sa odredbama ovog Zakona u roku od 60 dana od dana stupanja na snagu istog.
- (3) U izradi prijedloga provedbenih akata, obrađivač je obavezan osigurati učešće kantonalnih udruženja pripadnika branilačke populacije.

#### **Član 57.**

##### **(Ravnopravnost spolova)**

Sve imenice koje se odnose na bratioce i članove njihovih porodica, upotrijebljene u ovom Zakonu samo u muškom ili samo u ženskom rodu, odnose se na oba spola.

#### **Član 58.**

##### **(Stavljanje Zakona van snage)**

Danom stupanja na snagu ovog Zakona prestaje važiti Zakon o dopunskim pravima branilaca i članova njihovih porodica ("Službene novine Zeničko-dobojskog kantona" broj 6/06 i 9/07) i Zakon o dopunskim pravima branilaca i članova njihovih porodica – Prečišćeni tekst ("Službene novine Zeničko-dobojskog kantona" broj 5/13).

#### **Član 59.**

##### **(Primjena propisa u prijelaznom periodu)**

- (1) Do donošenja provedbenih propisa iz člana 56. ovog Zakona, primjenjivat će se akti doneseni na osnovu zakona navedenih u članu 58. ovog Zakona.
- (2) U slučajevima suprotnog ili drugačijeg definisanja ili regulisanja pojedinih pitanja u podzakonskim aktima iz stava (1) ovog člana, vrši se direktna primjena odredbi ovog Zakona.

#### **Član 60.**

##### **(Stupanje na snagu i objavljivanje Zakona)**

Ovaj Zakon stupa na snagu osmog dana od dana objavljivanja u "Službenim novinama Zeničko-dobojskog kantona", a primjenjivat će se od 01.01.2014. godine.

Broj: 01-02-2052/14

Datum, 29.01.2014. godine

Zenica

**PREDSJEDAVAJUĆI**

**Sretko Radišić, s.r.**

#### **VLADA**

#### **6.**

Na osnovu člana 16. stav 2. Zakona o Vladi Zeničko – dobojskog kantona ("Službene novine Zeničko-dobojskog kantona", broj: 7/10), a u vezi sa tačkom II Zaključka Vlade Zeničko-dobojskog kantona broj. 02-34-17941/10 od 11.06.2010. godine, na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 140. sjednici održanoj dana 11.12.2013. godine, donosi

#### **O D L U K U**

##### **O PRIJENOSU OKONČANIH PROJEKATA IZ PROGRAMA KAPITALNIH ULAGANJA U VODOPRIVREDNE OBJEKTE za 2004. godinu**

#### **Član 1.**

##### **(Predmet Odluke)**

Odobrava se prijenos okončanih projekata iz Programa kapitalnih ulaganja u vodoprivredne objekte u 2004. godini, na upravljanje i održavanje implementatoru Općini Visoko, u iznosu od 309.657,17 KM.

#### **Član 2.**

##### **(Preuzimanje okončanog projekta)**

Općina Visoko preuzima slijedeće okončane projekte iz 2004. godine:

- Izgradnja vodovoda B. Mahala, u iznosu od 78.160,00 KM,
- Izgradnja vodovoda D. Moštre, u iznosu od 48.531,05 KM,
- Izgradnja vodovoda Tušnjići, u iznosu od 6.230,00 KM,
- Izgradnja kanalizacije Kula-Banjer, u iznosu od 19.291,00 KM,
- Rekonstrukcija vodovoda Srhinje, u iznosu od 19.443,70 KM,

5.

Na temelju članka 37. stavak 1. točka f) Ustava Zeničko-dobojskog kantona, Skupština Zeničko-dobojskog kantona na 52. sjednici održanoj 28.01.2014. godine donosi

**ZAKON  
O DOPUNSKIM PRAVIMA BRANITELJA I  
ČLANOVA NJIHOVIH OBITELJI**

**DIO PRVI - OPĆE ODREDBE**

**Članak 1.  
(Predmet Zakona)**

- (1) Ovim Zakonom se uređuju uvjeti, način i postupak za ostvarivanje prava članova obitelji šehida, poginulih, umrlih i nestalih branitelja; članova uže obitelji poginulih, umrlih ili nestalih dobitnika ratnog priznanja i odlikovanja; dobitnika ratnih priznanja i odlikovanja i članova njihovih obitelji; ratnih vojnih invalida i članova njihovih obitelji i razvojačenih branitelja i članova njihovih obitelji, kao i druga pitanja iz oblasti zaštite branitelja i članova njihovih obitelji, koji imaju prebivalište na području Zeničko-dobojskog kantona (u daljnjem tekstu: Kanton), kao i povratnika u Republiku Srpsku koji ostvaruju osnovna prava iz branilačko-invalidske zaštite u općinama Kantona ili koji su na evidenciji mjerodavnog organa za vojne evidencije u općinama Kantona.
- (2) Pojam šehid ili pojam poginuli branitelj, u smislu ovog Zakona, koristi se po slobodnom izboru korisnika prava.
- (3) Osobe iz stavka (1) ovog članka prava po ovom Zakonu ostvaruju kao dopunska, uz prava koja su za branitelje i članove njihovih obitelji utvrđena Zakonom o pravima branitelja i članova njihovih obitelji ("Službene novine Federacije Bosne i Hercegovine" broj 33/04, 56/05, 70/07 i 9/10) i Zakonom o posebnim pravima dobitnika ratnih priznanja i odlikovanja i članova njihovih obitelji ("Službene novine Federacije Bosne i Hercegovine" broj 70/05, 61/06 i 9/10).

**Članak 2.  
(Definicije)**

U skladu sa odredbama zakona iz člana 1. stav (3) ovog Zakona, kod reguliranja prava i pogodnosti koja se tiču branilaca i članova njihovih porodica utvrđenih ovim Zakonom i drugim propisima na području Kantona, koriste se sljedeći pojmovi i definicije:

- a) Braniteljem, odnosno razvojačenim braniteljem (u daljnjem tekstu: branitelj) smatra se pripadnik Armije Republike Bosne i Hercegovine, Hrvatskog vijeća obrane i policije mjerodavnog organa unutarnjih poslova (u daljnjem tekstu: Oružane snage) koji je učestvovao u odbrani Bosne i Hercegovine (početak agresije na općinu Ravno) od 18.09.1991. do 23.12. 1996. godine, odnosno do prestanka neposredne ratne opasnosti i koji je razvojačen rješenjem mjerodavnog vojnog organa, kao i osoba koja je učestvovala u pripremi za odbranu i u odbrani Bosne i Hercegovine u periodu prije 18.09.1991. godine a koje je angažirano od mjerodavnih organa;
- b) Pod učešćem u odbrani Bosne i Hercegovine podrazumijeva se učešće u oružanom otporu i djelovanje u direktnoj svezi sa pružanjem otpora;
- c) Dobrovoljcem i organizatorom otpora smatra se pripadnik vojnih jedinica koji je učestvovao u pripremi za odbranu i u odbrani Bosne i Hercegovine u periodu do 19.06.1992. godine, kao i druga osoba koja nije bila vojni obveznik u vrijeme dobrovoljnog stupanja u Oružane snage i ostalo neprekidno u jedinicama do kraja rata, ili je ranije razvojačen od mjerodavnog vojnog organa;
- d) Veteranom se smatra osoba koja je stupila u Oružane snage od 18.09.1991. godine do 31.12. 1992. godine i ostalo neprekidno do 23.12.1995. godine, ili je ranije razvojačeno od mjerodavnog vojnog organa;
- e) Učesnikom rata smatra se svaka osoba koja je u sastavu Oružanih snaga provela najmanje jednu godinu neprekidno u periodu od 20.06.1992. godine do 23.12.1995. godine.

**Članak 3.  
(Pojmovi korišteni u Zakonu)**

- (1) Ratni vojni invalid, u smislu ovog Zakona, je branitelj kojem je to svojstvo utvrđeno rješenjem mjerodavnog organa sukladno Zakonu o pravima branitelja i članova njihovih obitelji, a po osnovu zadobivene rane, povrede, bolesti ili pogoršanja zdravstvenog stanja, usljed čega je nastupilo oštećenje njegovog organizma najmanje za 20%.
- (2) Član obitelji šehida, poginulog, umrlog, nestalog branitelja i umrlog ratnog vojnog invalida, u smislu ovog Zakona, je korisnik prava na obiteljsku invalidninu, na osnovu rješenja mjerodavnog organa izdatog sukladno Zakonu o pravima branitelja i članova njihovih obitelji.
- (3) Dijete šehida, poginulog, umrlog, nestalog branitelja bez oba roditelja, u smislu ovog Zakona, je član

obitelji šehida, poginulog, umrlog, nestalog branitelja, koje je u vrijeme gubitka oba roditelja bilo malodobno.

- (4) Djetetom dobitnika ratnog priznanja ili odlikovanja /ratnog vojnog invalida/ razvojačenog branitelja, u smislu ovog Zakona, smatra se dijete rođeno u braku/izvan braka, usvojeno dijete, kao i pastorče koje je sa istim živjelo u zajedničkom kućanstvu najmanje posljednju godinu dana.
- (5) Osoba sa naročitim zaslugama u odbrambeno-oslobodilačkom ratu, u smislu ovog Zakona, je dobitnik ratnog priznanja ili odlikovanja i nositelj "Partizanske spomenice 1941".
- (6) Dobitnik ratnog priznanja ili odlikovanja i član uže obitelji poginulog, umrlog ili nestalog dobitnika ratnog priznanja ili odlikovanja, u smislu ovog Zakona je korisnik prava na mjesečni novčani dodatak, na osnovu rješenja mjerodavnog organa, sukladno odredbama Zakona o posebnim pravima dobitnika ratnih priznanja i odlikovanja i članova njihovih obitelji.
- (7) Nositelj "Partizanske spomenice 1941" i član uže obitelji poginulog ili umrlog nositelja "Partizanske spomenice 1941", u smislu ovog Zakona je korisnik prava na mjesečni novčani dodatak, na osnovu rješenja mjerodavnog organa, sukladno odredbama Odluke o posebnim pravima nositelja "Partizanske spomenice 1941" i članova njihovih obitelji ("Službene novine Federacije Bosne i Hercegovine" broj 6/06).
- (8) Sa braniteljima, u smislu ovog Zakona, izjednačeni su u pravima učesnici narodnooslobodilačkog-antifašističkog rata 1941.-1945. godine, čiji je status utvrđen rješenjem mjerodavnog organa.

#### **Članak 4.**

##### **(Posebni korisnici prava po Zakonu)**

Prava po ovom Zakonu, na način i pod uvjetima utvrđenim podzakonskim aktima, može koristiti i:

- a) dijete šehida, poginulog, umrlog, nestalog branitelja, kojem je prestalo pravo na obiteljsku invalidninu – prava iz članaka 6., 15. – 17. i 23. ovog Zakona, do navršene 35. godine života;
- b) dijete poginulog, umrlog ili nestalog dobitnika ratnog priznanja ili odlikovanja, osim osobe iz točke a) ovog članka, kojem je prestalo pravo na mjesečni novčani dodatak i dijete umrlog ratnog vojnog invalida koje nije korisnik prava na obiteljsku invalidninu - prava iz članaka 6.,16.,17. i 23. ovog Zakona, do navršene 30. godine života;
- c) dijete umrlog razvojačenog branitelja koji je u

redovima Oružanih snaga proveo najmanje dvije godine i koje je sa istim živjelo u zajedničkom kućanstvu ili ga je isti izdržavao najmanje posljednju godinu dana prije smrti - prava iz članka 6.,16.,17. i 23. ovog Zakona, do navršene 30. godine života;

- d) udovica umrlog razvojačenog branitelja koji je u redovima Oružanih snaga proveo najmanje dvije godine, i koja je sa istim živjela u braku najmanje dvije posljednje godine dana prije smrti, pod uvjetom da nema druge prihode i da nije stupila u brak ili izvanbračnu zajednicu;
- e) roditelji umrlog ratnog vojnog invalida ili razvojačenog branitelja koji je u redovima Oružanih snaga proveo najmanje dvije godine, ukoliko ih je isti izdržavao posljednjih godinu dana prije smrti.

#### **DIO DRUGI - PRAVA**

##### **Članak 5.**

##### **(Dopunska prava po Zakonu)**

Branitelji i članovi njihovih obitelji, sukladno ovom Zakonu, ostvaruju sljedeća prava:

- a) Zdravstvena zaštita;
- b) Banjsko i klimatsko liječenje (medicinska rehabilitacija);
- c) Profesionalna rehabilitacija;
- d) Osiguranje povoljnijih uvjeta za upošljavanje;
- e) Izvanredna novčana pomoć;
- f) Prednosti u školovanju i stipendiranju;
- g) Rješavanje stambenog pitanja;
- h) Oslobođanje od plaćanja sudskih i administrativnih taksi;
- i) Sufinanciranje invalidskog sporta i obilježavanja značajnih datuma
- j) Podizanje nišana – nadgrobnog spomenika;
- k) Pomoć u slučaju smrti;
- l) Izgradnja prilaza do stambene zgrade;
- m) Posebna prava.

#### **POGLAVLJE I. ZDRAVSTVENA ZAŠTITA**

##### **Članak 6.**

##### **(Ostvarivanje prava)**

- (1) Braniteljii i članovi njihovih obitelji ostvaruju pravo

na zdravstvenu zaštitu iz obveznog zdravstvenog osiguranja, suglasno odredbama Zakona o zdravstvenoj zaštiti ("Službene novine Federacije BiH" broj 46/10 i 75/13) i Zakona o zdravstvenom osiguranju ("Službene novine Federacije BiH" broj 30/97, 7/02, 70/08 i 48/11) ukoliko to pravo ne mogu ostvariti po drugom osnovu.

- (2) Ostvarivanje zdravstvene zaštite za osobe koje nisu osigurane sukladno stavku (1) ovog članka, kao i prošireni obim prava iz oblasti zdravstvene zaštite branitelja i članova njihovih obitelji, posebnim propisom utvrđuje Skupština Zeničko-dobojskog kantona.
- (3) Propisom iz prethodnog stavka naročito se reguliše pitanje nabavke ortopedskih i drugih pomagala i njihova opravka, te osiguranje potrebnih lijekova i sanitetskog materijala za liječenje rana i povreda, posljedično vezanih za učešće u ratu.

#### **Članak 7.**

##### **(Prednost u korištenju usluga zdravstvenih ustanova)**

Mjerodavni organi u ustanovama iz oblasti zdravstva osigurati će isticanje obavijesti na vidnim mjestima da prednost bez čekanja u redu imaju dobitnici ratnih priznanja ili odlikovanja, nositelji "Partizanske spomenice 1941", ratni vojni invalidi, članovi obitelji šehida, poginulog, umrlog, nestalog branitelja, članovi uže obitelji poginulog, umrlog ili nestalog dobitnika ratnog priznanja ili odlikovanja i članovi uže obitelji poginulog ili umrlog nositelja "Partizanske spomenice 1941", koji će svoj status dokazivati odgovarajućim iskaznicama.

#### **Članak 8.**

##### **(Pravo na liječenje u inozemstvu)**

- (1) Ratni vojni invalidi, dobitnici ratnih priznanja ili odlikovanja, razvojačeni branitelji, nositelji "Partizanske spomenice 1941", članovi obitelji šehida, poginulih, umrlih, nestalih branitelja, članovi uže obitelji poginulog, umrlog ili nestalog dobitnika ratnog priznanja ili odlikovanja, djeca dobitnika ratnih priznanja ili odlikovanja, djeca ratnih vojnih invalida i djeca razvojačenih branitelja, ostvaruju pravo na liječenje u inozemstvu prema utvrđenoj medicinskoj indikaciji i sukladno Zakonu o zdravstvenom osiguranju i propisom o upućivanju osiguranih osoba na liječenje u inozemstvo.
- (2) Način i postupak ostvarivanja ovog prava, sukladno federalnim propisima koji regulišu ovu oblast, posebnim propisom utvrđuje Vlada Zeničko-dobojskog kantona (u daljnjem tekstu: Vlada Kantona).

## **POGLAVLJE II. BANJSKO I KLIMATSKO LIJEČENJE (MEDICINSKA REHABILITACIJA)**

#### **Članak 9.**

##### **(Korisnici prava)**

- (1) Ratni vojni invalid, dobitnik ratnog priznanja ili odlikovanja, razvojačeni branitelji, nositelj "Partizanske spomenice 1941", član obitelji šehida, poginulog, umrlog, nestalog branitelja i član uže obitelji poginulog, umrlog ili nestalog dobitnika ratnog priznanja ili odlikovanja, ima pravo na medicinsku rehabilitaciju u banjско-klimatskom lječilištu, ukoliko je prema medicinskim indikacijama takvo liječenje potrebno.
- (2) Izuzetno, na medicinsku rehabilitaciju može biti upućen i član invalidskog sportskog kluba i reprezentacije u invalidskom sportu, kao i pojedinac RVI-sportista, u pripremanju za takmičenja.

#### **Članak 10.**

##### **(Sadržina prava)**

Banjско-klimatsko liječenje, prema ovom zakonu, podrazumijeva liječenje koje je neophodno kao nastavak liječenja od posljedica ranjavanja, povređivanja i bolesti koje su propisane kao indikacije za to liječenje, a koje se obavlja u specijalizovanim zdravstvenim ustanovama u kojima se u liječenju primjenjuje i prirodni faktor, drugim zdravstvenim ustanovama u kojima se liječenje obavlja pretežno prirodnim faktorom, kao i u ustanovama i privrednim društvima osnovanim za liječenje, odmor i rekreaciju u kojima se u liječenju primjenjuje prirodni faktor.

#### **Članak 11.**

##### **(Regulisanje pružanja usluga)**

Sa ustanovama iz članka 10. ovog Zakona, Ministarstvo za braniteljska pitanja Zeničko-dobojskog kantona (u daljnjem tekstu: Ministarstvo) zaključuje ugovore o banjско-klimatskom liječenju i rehabilitaciji, kojima se naročito regulišu pitanja u pogledu obima, kvaliteta i cijene pružanja zdravstvenih i drugih usluga, kao i druga međusobna prava i obveze.

#### **Članak 12.**

##### **(Ostvarivanje prava)**

- (1) Vlada Kantona će posebnim propisom utvrditi uvjete, način i postupak upućivanja pripadnika branilačke populacije na medicinsku rehabilitaciju u banjско-klimatska lječilišta, kao i ostala pitanja od značaja za ostvarivanje ovog prava.
- (2) Propisom iz prethodnog stavka za dobitnike ratnog priznanja ili odlikovanja i nositelje "Partizanske

spomenice 1941", osigurat će se ostvarivanje prava u obimu koji je propisan za ratne vojne invalide.

### POGLAVLJE III. PROFESIONALNA REHABILITACIJA

#### **Članak 13.** **(Korisnici prava)**

- (1) Ratni vojni invalid, dobitnik ratnog priznanja ili odlikovanja i razvojačeni branitelj, na osnovu preostale radne sposobnosti, ima pravo na profesionalnu rehabilitaciju uključujući prekvalifikaciju i školovanje za obavljanje poslova za koje se traži više stručna sprema od one koju ima, pod uvjetom da je neuposlen i ako prema općem obrazovanju, godinama života, zdravstvenom stanju i drugim okolnostima ima uvjete za uspješnu rehabilitaciju.
- (2) Profesionalnom rehabilitacijom osigurava se osposobljavanje za vršenje ranijeg ili drugog odgovarajućeg zanimanja, stručno osposobljavanje za vršenje određenog zanimanja i stručno usavršavanje.

#### **Članak 14.** **(Ostvarivanje prava)**

- (1) Pravo na profesionalnu rehabilitaciju se utvrđuje na osnovu pribavljenog nalaza, ocjene i mišljenja povjerenstva stručne ustanove za ocjenjivanje radne sposobnosti, sukladno propisima iz oblasti mirovinsko-invalidskog osiguranja.
- (2) Uvjete, način i postupak za ostvarivanje prava na profesionalnu rehabilitaciju na osnovu preostale radne sposobnosti, propisuje posebnim pravilnikom ministar Ministarstva.

### POGLAVLJE IV. OSIGURANJE POVOLJNIJIH UVJETA ZA UPOŠLJAVANJE

#### **Članak 15.** **(Prednost pri upošljavanju)**

- (1) Ratni vojni invalid, razvojačeni branitelj i član obitelji šehida, poginulog, umrlog, nestalog branitelja koji je na evidenciji Službe za upošljavanje Kantona, ostvaruje pravo na prednost pri upošljavanju, pod jednakim uvjetima i sukladno propisima iz oblasti radnog zakonodavstva.
- (2) Pravo iz stavka (1) ovog članka ne može ostvariti osoba kojoj je radni odnos, zasnovan po osnovu ranije ostvarene prednosti pri upošljavanju, prestao njegovom krivicom ili je po prestanku radnog odnosa ostvario pravo na otpremninu.

#### **Član 16.** **(Prednost pri korištenju programa Službe za upošljavanje)**

Ratni vojni invalid, razvojačeni branitelj i član obitelji šehida, poginulog, umrlog, nestalog branitelja koji je na evidenciji Službe za upošljavanje Kantona, ima prednost pri korištenju programa iste Službe, namijenjenog trajnom upošljavanju.

#### **Članak 17.** **(Dodjela kredita za upošljavanje)**

- (1) U cilju otvaranja novih radnih mjesta namijenjenih upošljavanju branitelja i članova njihovih obitelji, mogu se dodijeliti kreditna sredstava.
- (2) Vlada Kantona će posebnim propisom utvrditi visinu novčanih sredstava za kreditiranje upošljavanja, kriterije, način i postupak dodjele istih, kao i ostala pitanja od značaja za ostvarivanje ovog prava.

### POGLAVLJE V. IZVANREDNA NOVČANA POMOĆ

#### **Članak 18.** **(Novčana pomoć zbog izvanrednih okolnosti)**

Braniteljima i članovima njihovih obitelji, u slučaju izvanrednih okolnosti kao što su elementarne nepogode i nesreće, smrt i bolest člana kućnog domaćinstva i u drugim slučajevima koji uzrokuju tešku ekonomsku situaciju, može se odobriti izvanredna novčana pomoć u svrhu osiguranja sredstava za osnovne potrebe.

#### **Članak 19.** **(Uvjeti)**

Vlada Kantona će posebnim propisom utvrditi visinu novčanih sredstava koja mogu biti odobrena u svrhu izvanredne novčane pomoći, uvjete, način i postupak dodjele istih, kao i ostala pitanja od značaja za ostvarivanje ovog prava.

### POGLAVLJE VI. PREDNOSTI U ŠKOLOVANJU I STIPENDIRANJU

#### **Članak 20.** **(Prednost pri upisu u obrazovne ustanove)**

- (1) Dobitnik ratnog priznanja ili odlikovanja, ratni vojni invalid, razvojačeni branitelj, dijete šehida, poginulog, umrlog, nestalog branitelja, dijete dobitnika ratnog priznanja ili odlikovanja, dijete ratnog vojnog invalida i dijete razvojačenog branitelja, koji je redovni učenik i

student, ima pravo prvenstva pod jednakim uvjetima pri upisu u obrazovnu ustanovu čiji je osnivač Kanton ili općina, odnosno smještaju u đački i studentski dom na području Kantona.

- (2) Vlada Kantona će posebnim propisom utvrditi uvjete, način i postupak realizacije prava iz ovog članka.

#### **Članak 21. (Besplatan upis)**

Osoba iz članka 20. ovog Zakona, ima pravo na besplatan upis u novu školsku/studijsku godinu u srednjoškolskoj i visokoškolskoj ustanovi čiji je osnivač Kanton ili općina, sukladno uvjetima utvrđenim posebnim propisom koji donosi Vlada Kantona.

#### **Članak 22. (Besplatni obvezni udžbenici)**

Djeca dobitnika ratnih priznanja ili odlikovanja, ratnih vojnih invalida i razvojačenih branitelja, imaju pravo na besplatne obvezne udžbenike za potrebe redovnog školovanja u osnovnim i srednjim školama, sukladno uvjetima utvrđenim posebnim propisom koji donosi Vlada Kantona.

#### **Članak 23. (Stipendiranje studija)**

Branitelji i članovi njihovih obitelji, koji su srednje obrazovanje stekli u školama na području Bosne i Hercegovine, imaju pravo na dodjelu stipendije za redovni studij na visokoškolskim ustanovama, sukladno posebnim propisom koji donosi Vlada Kantona, a kojim se naročito utvrđuje visina novčanih sredstava za stipendiranje, uvjeti, način i postupak dodjele stipendija, kao i ostala pitanja od značaja za ostvarivanje ovog prava.

### **POGLAVLJE VII. RJEŠAVANJE STAMBENOG PITANJA**

#### **Članak 24. (Jednokratna novčana sredstva)**

Dobitnik ratnog priznanja ili odlikovanja, ratni vojni invalid, razvojačeni branitelj koji je u redovima Oružanih snaga proveo najmanje dvije godine, član obitelji šehida, poginulog, umrlog, nestalog branitelja i član uže obitelji poginulog, umrlog ili nestalog dobitnika ratnog priznanja ili odlikovanja, koji nema riješeno stambeno pitanje, a sa prebivalištem odnosno boravištem na području Kantona je u trajanju od najmanje tri godine neprekidno, ima pravo na jednokratnu bespovratnu dodjelu novčanih sredstava za rješavanje stambenih potreba.

#### **Članak 25.**

##### **(Prioritetno rješavanje stambenih pitanja)**

Sukladno važećim propisima, Vlada Kantona osigurava prioritetno rješavanje stambenih pitanja pripadnika branilačke populacije putem stambenog zbrinjavanja i pomoći u stambenom zbrinjavanju, po pravu prvenstva kako sljede:

- a) dobitnici ratnih priznanja ili odlikovanja;
- b) djeca šehida, poginulih, umrlih, nestalih branitelja bez oba roditelja i ratni vojni invalidi sa oštećenjem organizma od 100% I grupe;
- c) obitelji sa dva i više šehida, poginulih, umrlih, nestalih branitelja i ratni vojni invalidi sa oštećenjem organizma od 100% II grupe;
- d) obitelji šehida, poginulih, umrlih, nestalih branitelja i ratni vojni invalidi sa oštećenjem organizma od 90%, 80% i 70%;
- e) članovi uže obitelji poginulih, umrlih ili nestalih dobitnika ratnih priznanja ili odlikovanja;
- f) ostali ratni vojni invalidi i razvojačeni branitelji.

#### **Članak 26.**

##### **(Stambeno zbrinjavanje povratnika u RS i raseljenih osoba)**

- (1) Osoba iz članka 24. ovog Zakona, koja ima status povratnika u RS ili raseljene osobe, u svrhu osiguranja uvjeta za održivi povratak u mjesto u kojem je imalo prebivalište ili boravište prije početka agresije na Republiku Bosnu i Hercegovinu, može ostvariti pravo na jednokratnu dodjelu sredstava za stambeno zbrinjavanje.
- (2) Pravo iz stavka (1) ovog članka nema osoba koja je na području Kantona riješila svoje stambeno pitanje.

#### **Članak 27.**

##### **(Ostvarivanje prava)**

Vlada Kantona će posebnim propisom utvrditi visinu novčanih sredstava namijenjenih trajnom stambenom zbrinjavanju branitelja i članova njihovih obitelji, uvjete, način i postupak dodjele istih, kao i ostala pitanja od značaja za ostvarivanje ovog prava.

### **POGLAVLJE VIII. OSLOBAĐANJE OD PLAĆANJA SUDSKIH I ADMINISTRATIVNIH PRISTOJBI**

#### **Članak 28.**

##### **(Korisnici prava)**

Dobitnik ratnog priznanja ili odlikovanja, ratni vojni

invalid, član obitelji šehida, poginulog, umrlog, nestalog branitelja, član uže obitelji poginulog, umrlog ili nestalog dobitnika ratnog priznanja ili odlikovanja i neuposleni razvojačeni branitelj, oslobođen je plaćanja pristojbi u postupku pred sudovima u Kantonu, kantonalnih i općinskih administrativnih pristojbi.

**Članak 29.**  
**(Posebni slučajevi oslobađanja)**

Dobitnik ratnog priznanja ili odlikovanja, ratni vojni invalid, razvojačeni branitelj, član obitelji šehida, poginulog, umrlog, nestalog branitelja, dijete dobitnika ratnog priznanja ili odlikovanja, dijete ratnog vojnog invalida i dijete razvojačenog branitelja, u postupku pribavljanja dokumentacije u cilju stipendiranja i pomoći u školovanju, kao prava predviđenih ovim zakonom, oslobođen je plaćanja kantonalnih i općinskih administrativnih pristojbi i naknada za sva uvjerenja potrebna u tu svrhu, izdata u školskim ustanovama, čiji je osnivač Kanton.

**POGLAVLJE IX. SUFINANCIRANJE INVALIDSKOG SPORTA I OBILJEŽAVANJA ZNAČAJNIH DATUMA**

**Članak 30.**  
**(Sufinanciranje sportskih aktivnosti)**

- (1) Invalidski sportski savez i invalidski sportski klub, čiji sastav pretežno čine ratni vojni invalidi sa područja Kantona, ostvaruje pravo na sufinanciranje troškova učešća u sportskim takmičenjima i manifestacijama, odnosno u organizovanju i održavanju sportsko-rekreativnih takmičenja i aktivnosti, te manifestacija u sportu i rekreaciji invalidnih osoba.
- (2) Pravo na financijsku pomoć za takmičarske aktivnosti može ostvariti i ratni vojni invalid -sportista pojedinac.
- (3) Vlada Kantona će posebnim propisom utvrditi visinu novčanih sredstava namijenjenih ostvarivanju ovog prava, uvjete, način i postupak dodjele istih.

**Članak 31.**  
**(Sufinanciranje obilježavanja značajnih datuma)**

Vlada Kantona, na prijedlog Ministarstva, odobrava kantonalnoj udruzi pripadnika braniteljske populacije sufinanciranje troškova organizovanja i održavanja manifestacije povodom obilježavanja značajnog datuma i događaja iz proteklog odbrambeno-oslobodilačkog rata.

**Članak 32.**  
**(Sredstva za rad branilačkih udruga)**

Vlada Kantona odobrava sredstva za rad i aktivnosti

kantonalnih udruga pripadnika branilačke populacije od posebnog društvenog interesa, sukladno posebnim propisom kojim utvrđuje visinu, uvjete, način i postupak dodjele istih sredstava.

**POGLAVLJE X. PODIZANJE NIŠANA–  
NADGROBNOG SPOMENIKA**

**Članak 33.**  
**(Jedinstveno spomen obilježje šehida/poginulog branitelja)**

Svakom pripadniku Oružanih snaga RBiH koji je poginuo ili umro kao učesnik u odbrani Bosne i Hercegovine u proteklom odbrambeno-oslobodilačkom ratu i koji je sahranjen na području Kantona, osigurava se podizanje jedinstvenog spomen obilježja, izrađenog sukladno usvojenim idejnim rješenjem.

**Članak 34.**  
**(Spomen obilježja za branitelje ukopane izvan Kantona)**

Vlada Kantona, na prijedlog Ministarstva, posebnim aktom odobrava podizanje nišana – nadgrobnog spomenika i za poginule pripadnike Oružanih snaga RBiH koji su ukopani izvan područja Kantona, a koji su početkom agresije na Bosnu i Hercegovinu imali prebivalište na području Kantona.

**Članak 35.**  
**(Naknada troškova podizanja nišana/nadgrobnog spomenika)**

- (1) Član obitelji šehida, poginulog, umrlog ili nestalog branitelja ili druga osoba koja vlastitim sredstvima izvrši podizanje nišana - nadgrobnog spomenika šehidu/ poginulom branitelju iz članka 33. i 34. ovog Zakona, ima pravo na naknadu troškova u visini jedne i po prosječne neto plaće isplaćene u Federaciji Bosne i Hercegovine u prethodnoj godini.
- (2) Vlada Kantona će posebnim propisom utvrditi uvjete, način i postupak realizacije prava iz stavka (1) ovog članka.

**Članak 36.**  
**(Spomen obilježje dobitnika ratnog priznanja ili odlikovanja)**

- (1) U slučaju smrti dobitnika ratnog priznanja "Zlatni ljiljan", "Red hrvatskog trolista" i nositelja "Partizanske spomenice 1941", osiguravaju se sredstva u svrhu naknade troškova podizanja nišana/nadgrobnog spomenika, u visini dvije prosječne neto plaće



isplaćene u Federaciji Bosne i Hercegovine u prethodnoj godini.

- (2) U slučaju smrti ostalih dobitnika ratnog priznanja ili odlikovanja osiguravaju se sredstva u svrhu naknade troškova podizanja nišana/nadgrobnog spomenika, u visini jedne prosječne neto plaće isplaćene u Federaciji Bosne i Hercegovine u prethodnoj godini.
- (3) Pravo na naplatu sredstava iz stavka (1) i (2) ovog članka, pripada članu obitelji, odnosno drugom fizičkom ili pravnoj osobi koje izvrši podizanje nišana/nadgrobnog spomenika umrlom branitelju.
- (4) Odluku o naknadi troškova podizanja spomen obilježja iz ovog članka, a na osnovu podnesenog zahtjeva i dokaza u tom smislu, donosi ministar Ministarstva.

## POGLAVLJE XI. POMOĆ U SLUČAJU SMRTI

### Članak 37.

#### (Naknada troškova dženaze/sahrane)

- (1) U slučaju smrti dobitnika ratnog priznanja ili odlikovanja i nositelja "Partizanske spomenice 1941", članovi obitelji sa kojima je umrli živio u zajedničkom domaćinstvu u vrijeme smrti ili druga osoba koja vlastitim sredstvima sahrani umrlog, imaju pravo na jednokratnu pomoć najmanje u visini jedne i pol prosječne neto plaće isplaćene u Federaciji Bosne i Hercegovine u prethodnoj godini, prema podacima Zavoda za statistiku Federacije Bosne i Hercegovine, ukoliko to pravo nisu ostvarili prema drugom propisu.
- (2) U slučaju smrti ratnog vojnog invalida i razvojačenog branitelja, članovi obitelji sa kojima je umrli živio u zajedničkom domaćinstvu u vrijeme smrti ili druga osoba koje vlastitim sredstvima sahrani umrlog, imaju pravo na jednokratnu pomoć najmanje u visini prosječne neto plaće isplaćene u Federaciji Bosne i Hercegovine u prethodnoj godini, prema podacima Zavoda za statistiku Federacije Bosne i Hercegovine, ukoliko to pravo nisu ostvarili prema drugom propisu.
- (3) U slučaju smrti člana obitelji šehida, poginulog, umrlog, nestalog branitelja i člana uže obitelji poginulog, umrlog ili nestalog dobitnika ratnog priznanja ili odlikovanja, koji je prije smrti sa prebivalištem odnosno boravištem na području Kantona bio u trajanju od najmanje dvije godine neprekidno, član obitelji ili druga osoba koja vlastitim sredstvima sahrani umrlog ima pravo na novčanu pomoć u svrhu naknade troškova dženaze - sahrane (troškovi prijevoza i prijenosa umrle osobe, opremanja

i ukopa) u iznosu jedne polovine prosječne neto plaće isplaćene u Federaciji Bosne i Hercegovine u prethodnoj godini, ukoliko istu pomoć ne može ostvariti po osnovu Federalnog zakona ili na drugi način.

- (4) Izuzetno, pomoć iz stavka (3) ovog članka se može odobriti i u većem iznosu, ukoliko se član obitelji koji sahranjuje umrlog nalazi u teškoj socijalno-ekonomskoj situaciji.
- (5) Vlada Kantona će posebnim propisom utvrditi način i postupak dodjele ovih sredstava, dokumentaciju koju je korisnik prava dužan podnijeti, kao i ostala pitanja od značaja za ostvarivanje ovog prava.

### Članak 38.

#### (Prava u slučaju smrti osobe sa naročitim zaslugama)

- (1) U slučaju smrti osobe sa naročitim zaslugama u odbrambeno-oslobodilačkom ratu, općina na području koje je isti imao prebivalište vrši obavještanje o smrti putem javnih medija.
- (2) U slučaju smrti dobitnika ratnog priznanja "Zlatni ljiljan" i "Red hrvatskog trolista" i nositelja "Partizanske spomenice 1941", općina na području koje je isti imao prebivalište, u saradnji sa Kantonalnom udruhom dobitnika ratnih priznanja i odlikovanja, organizuje ukop - sahranu uz državne počasti.
- (3) Općine na području Zeničko-dobojskog kantona poduzet će aktivnosti na određivanju i uređenju lokacija za ukop - sahranu osobe sa naročitim zaslugama.

## POGLAVLJE XII. IZGRADNJA PRILAZA DO STAMBENE ZGRADE

### Članak 39.

#### (Korisnik prava)

Ratni vojni invalid I grupe koji nije sposoban za kretanje bez invalidskih kolica, ima pravo na uklanjanje arhitektonsko-urbanističkih barijera za prilaz i ulazak u stambenu zgradu u kojoj stanuje i za korištenje stana.

### Članak 40.

#### (Uvjeti za ostvarivanje)

- (1) Pravo iz članka 39. ovog Zakona se može ostvariti jednokratno i pod uvjetom da se radi o stambenoj jedinici sa riješenim imovinsko-pravnim odnosima.
- (2) Realizaciju ovog prava dužna je osigurati općina na području koje se stambena zgrada nalazi.

## POGLAVLJE XIII. POSEBNA PRAVA

**Članak 41.****(Posebna prava osoba sa naročitim zaslugama)**

- (1) Pod uvjetom da prebivalište odnosno boravište na području Kantona ima neprekidno najmanje tri godine prije stupanja na snagu ovog Zakona, dobitnik ratnog priznanja ili odlikovanja i nositelj "Partizanske spomenice 1941" ima pravo na jednokratno novčano primanje u toku jedne kalendarske godine, u visini koju utvrdi Vlada Kantona, a prema dinamici isplate koju utvrdi Ministarstvo.
- (2) Pod uvjetom iz prethodnog stavka, dobitniku ratnog priznanja ili odlikovanja za vrijeme neuposlenosti odobrava se mjesečna novčana naknada sukladno posebnim propisom koji donosi Vlada Kantona, a kojim se naročito utvrđuje visina novčanih sredstava u ovu svrhu, uvjeti, način i postupak dodjele istih, kao i ostala pitanja od značaja za ostvarivanje ovog prava.
- (3) U realizaciji prava na osiguranje povoljnijih uvjeta za upošljavanje (Poglavlje IV. članovi 15. do 17.) i prednosti u školovanju i stipendiranju (Poglavlje VI. članovi 20. do 23.) iz ovog Zakona, prednost u okviru branilačke kategorije kojoj pripada (ratni vojni invalid, razvojačeni branitelj, član obitelji šehida, poginulog, umrlog, nestalog branitelja) ima dobitnik ratnog priznanja ili odlikovanja odnosno član obitelji poginulog, umrlog, nestalog branitelja - dobitnika ratnog priznanja ili odlikovanja.

**Članak 42.****(Prednost u korištenju usluga državnih organa i javnih ustanova)**

Članovi obitelji šehida poginulih, umrlih, nestalih branitelja, ratni vojni invalidi, dobitnici ratnih priznanja ili odlikovanja i nositelji "Partizanske spomenice 1941", imaju prioritet u korištenju usluga državnih organa i javnih ustanova na području Kantona odnosno općina, o čemu su mjerodavni organi u istim pravnim osobama dužni istaknuti obavijest na vidnim mjestima.

## DIO TREĆI - OSTVARIVANJE PRAVA

**Članak 43.****(Izuzeci i ograničenja u korištenju prava)**

- (1) Prava utvrđena ovim Zakonom ne mogu koristiti osobe kojima je ostvarenje istih omogućeno po drugom pravnom osnovu.
- (2) Prava utvrđena ovim Zakonom se mogu koristiti za period dok postoje propisani uvjeti za njihovo koriš-

tenje i ne mogu se nasljeđivati niti prenositi na druge osobe.

**Članak 44.****(Osobe koja ne mogu ostvariti prava)**

Prava prema ovom Zakonu, ne mogu ostvariti:

- a) osobe koje su samovoljno, bez odobrenja mjerodavne komande napustila Oružane snage (dezertirala);
- b) Osobe koje su se sama ranila ili povrijedila radi izbjegavanja vojne dužnosti za ciljeve odbrane i sigurnosti Bosne i Hercegovine;
- c) Osobe koje su osuđene pravosnažnom sudskom presudom zbog izvršenja težih krivičnih djela protiv ustavnog poretka Bosne i Hercegovine, ustavnog poretka Federacije Bosne i Hercegovine, krivičnih djela protiv čovječnosti i međunarodnog prava i krivičnih djela protiv Oružanih snaga;
- d) članovi obitelji osoba koja su osuđena za djela iz točki a), b) i c) ovog članka.

**Članak 45.****(Prestanak prava)**

- (1) Prestanak svojstva dobitnika ratnog priznanja ili odlikovanja, ratnog vojnog invalida ili člana obitelji šehida, poginulog, umrlog, nestalog branitelja, uže obitelji poginulog, umrlog ili nestalog dobitnika ratnog priznanja ili odlikovanja i obitelji umrlog ratnog vojnog invalida (korisnika prava na ličnu, odnosno obiteljsku invalidninu ili mjesečni novčani dodatak) sukladno federalnim propisima iz oblasti branilačko-invalidske zaštite, ima za posljedicu prestanak prava utvrđenih ovim Zakonom, ukoliko su ta prava ostvarena na osnovu tog svojstva i ukoliko ovim Zakonom nije drugačije rečeno.
- (2) Korisnik prava po ovom Zakonu je dužan u roku od 15 dana prijaviti svaku promjenu koja povlači izmjenu ili gubitak prava utvrđenih ovim Zakonom.

**Članak 46.****(Dokazivanje statusa)**

U postupku ostvarivanja prava po ovom Zakonu, branitelji i članovi njihovih obitelji svoj status dokazuju rješenjem mjerodavne općinske službe o priznavanju svojstva dobitnika ratnog priznanja ili odlikovanja i ratnog vojnog invalida odnosno člana obitelji šehida, poginulog, umrlog, nestalog branitelja i člana uže obitelji poginulog, umrlog ili nestalog dobitnika ratnog priznanja ili odlikovanja, ili uvjerenjem mjerodavnog organa, izdatog sukladno Zakonu o upravnom postupku ("Službene novine FBiH" broj 2/98 i 48/99).

## DIO ČETVRTI - PROVOĐENJE ZAKONA

**Članak 47.****(Rješavanje o pravima u prvostepenom postupku)**

- (1) Mjerodavna općinska služba, prema mjestu prebivališta podnositelja zahtjeva, rješava u prvom stupnju o pravima iz ovog Zakona.
- (2) Službenu evidenciju o korisnicima prava po ovom Zakonu vode mjerodavne općinske službe.

**Članak 48.****(Rješavanje o pravima u drugostupanjskom postupku)**

- (1) Žalba na prvostupanjsko rješenje može se uložiti u roku od 8 dana od dana prijema rješenja.
- (2) Po žalbi izjavljenoj na prvostupanjsko rješenje rješava Ministarstvo.
- (3) Protiv rješenja donesenog po žalbi može se pokrenuti upravni spor.

**Članak 49.****(Primjena odredbi Zakona o upravnom postupku)**

U postupku za ostvarivanje prava prema ovom Zakonu primjenjuju se odredbe Zakona o upravnom postupku.

**Članak 50.****(Izuzeci u primjeni odredbi)**

Odredbe iz članka 47. do 49. ovog Zakona o mjerodavnosti i postupku za ostvarivanje prava, ne primjenjuju se u slučajevima u kojima je Zakonom ili propisom donesenim u izvršenju istog drugačije regulirano.

## DIO PETI - NAKNADA ŠTETE

**Članak 51.****(Obveza povrata dodijeljenih sredstava)**

Osoba kojoj je isplaćeno novčano primanje prema ovom Zakonu, na koje nije imalo pravo, dužno je vratiti primljeni iznos:

- a) ako je na osnovu netačnih podataka koje je znalo ili je moralo znati da su netačni, ili je na drugi protivpravni način ostvarilo novčano primanje prema ovom Zakonu, koje mu ne pripada, ili je ostvarilo novčano primanje u većem iznosu nego što mu pripada;
- b) ako je ostvarilo novčano primanje zbog toga što nije prijavilo nastale promjene koje utiču na gubitak, prestanak ili smanjenje obima nekog prava, a znalo je ili je moralo znati za te promjene;

- c) ako je primilo veći iznos od iznosa koje mu je određeno rješenjem.

**Članak 52.****(Zastara rokova potraživanja)**

- (1) Potraživanje iz članka 51. ovog Zakona zastarjeva protekom roka određenog zakonom kojim se uređuje zastarjelost potraživanja za odnosnu vrstu potraživanja. Ovi rokovi počinju teći od dana konačnosti rješenja kojim je utvrđeno da isplaćeno primanje ne pripada ili pripada u manjem obimu, odnosno od dana kada je izvršena nepravilna isplata.
- (2) Obveza vraćanja nepravilno isplaćenog iznosa postoji bez obzira na to da li je rješenje kojim je toj osobi pravo priznato, poništeno ili ukinuto.
- (3) Ukoliko je nepravilna isplata nastala kao posljedica greške organa koji je vodio postupak, isti organ je dužan nadoknaditi nepravilno isplaćena sredstva.

## DIO ŠESTI - SREDSTVA ZA OSTVARIVANJE PRAVA

**Članak 53.****(Osiguravanje sredstava za provođenje Zakona)**

- (1) Sredstva za financiranje prava propisanih ovim Zakonom se osiguravaju u proračunu Kantona i općina.
- (2) Sredstva iz stavka (1) ovog članka, koja se odnose na proračun Kantona, planiraju se u iznosu od najmanje 4% redovnih proračunskih sredstava.

**Članak 54.****(Troškovi postupka)**

- (1) Troškove postupka u svezi sa ostvarivanjem prava prema ovom Zakonu, snosi organ koji vodi postupak.
- (2) U postupku za ostvarivanje prava po ovom Zakonu ne plaća se pristojba.
- (3) Na novčana primanja prema ovom Zakonu, ne plaćaju se porezi i doprinosi.

## DIO SEDMI - PRIJELAZNE I ZAVRŠNE ODREDBE

**Članak 55.****(Nadzor nad provođenjem Zakona)**

- (1) Nadzor nad provođenjem ovog Zakona i propisa donesenih na osnovu njega, te neposredan upravni i financijski nadzor i kontrolu trošenja sredstava namijenjenih za ostvarivanje prava po ovom Zakonu, vrši Ministarstvo.

- (2) U izvršavanju svojih obveza iz stavka (1) ovog članka, Ministarstvo kao kontrolor u smislu odredbi Zakona o zaštiti osobnih podataka ("Službeni glasnik Bosne i Hercegovine" broj 49/06, 76/11 i 89/11) vrši obradu osobnih podataka neophodnih za utvrđivanje identiteta podnosioca zahtjeva za korištenje prava po Zakonu, uključivo jedinstveni matični broj građana.
- (3) Sukladno odredbama važećih propisa iz iste oblasti, Ministarstvo može putem web stranice Kantona izvršiti objavljivanje informacija koje se odnose na korisnike prava i odobravanje novčanih sredstava sa transfera Ministarstva u svrhu ostvarenja prava po ovom Zakonu.

### Članak 56.

#### (Donošenje provedbenih propisa)

- (1) Mjerodavni organi Kantona u smislu ovog Zakona dužni su donijeti provedbene propise za primjenu Zakona u roku od 90 dana od dana stupanja na snagu istog.
- (2) Mjerodavni organi Kantona i općine u smislu ovog Zakona, dužni su usaglasiti odredbe važećih propisa sa odredbama ovog Zakona u roku od 60 dana od dana stupanja na snagu istog.
- (3) U izradi prijedloga provedbenih akata, obrađivač je obvezan osigurati učešće kantonalnih udruga pripadnika branilačke populacije.

### Članak 57.

#### (Ravnopravnost spolova)

Sve imenice koje se odnose na branitelje i članove njihovih obitelji, upotrijebljene u ovom Zakonu samo u muškom ili samo u ženskom rodu, odnose se na oba spola.

### Članak 58.

#### (Stavljanje Zakona izvan snage)

Danom stupanja na snagu ovog Zakona prestaje važiti Zakon o dopunskim pravima branitelja i članova njihovih obitelji ("Službene novine Zeničko-dobojskog kantona" broj 6/06 i 9/07) i Zakon o dopunskim pravima branitelja i članova njihovih obitelji – Pročišćeni tekst ("Službene novine Zeničko-dobojskog kantona" broj 5/13).

### Članak 59.

#### (Primjena propisa u prijelaznom periodu)

- (1) Do donošenja provedbenih propisa iz članka 56. ovog Zakona, primjenjivat će se akti doneseni na osnovu zakona navedenih u članku 58. ovog Zakona.
- (2) U slučajevima suprotnog ili drugačijeg definisanja ili regulisanja pojedinih pitanja u podzakonskim aktima

iz stavka (1) ovog članka, vrši se direktna primjena odredbi ovog Zakona.

### Članak 60.

#### (Stupanje na snagu i objavljivanje Zakona)

Ovaj Zakon stupa na snagu osmog dana od dana objavljivanja u "Službenim novinama Zeničko-dobojskog kantona", a primjenjivat će se od 01.01.2014. godine.

Broj: 01-02-2052/14

Datum, 29.01.2014. godine

Zenica

**PREDSJEDATELJ**

**Sretko Radišić, v.r.**

### VLADA

#### 6.

Na temelju članka 16. stavak 2. Zakona o Vladi Zeničko – dobojskog kantona ("Službene novine Zeničko-dobojskog kantona", broj: 7/10), a u svezi sa točkom II Zaključka Vlade Zeničko-dobojskog kantona broj. 02-34-17941/10 od 11.06.2010. godine, na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 140. sjednici održanoj dana 11.12.2013. godine, donosi

### O D L U K U

#### O PRIJENOSU OKONČANIH PROJEKATA IZ PROGRAMA KAPITALNIH ULAGANJA U VODOPRIVREDNE OBJEKTE za 2004. godinu

### Članak 1.

#### (Predmet Odluke)

Odobrava se prijenos okončanih projekata iz Programa kapitalnih ulaganja u vodoprivredne objekte u 2004. godini, na upravljanje i održavanje implementatoru Općini Visoko, u iznosu od 309.657,17 KM.

### Članak 2.

#### (Preuzimanje okončanog projekta)

Općina Visoko preuzima sljedeće okončane projekte iz 2004. godine:

- Izgradnja vodovoda B. Mahala, u iznosu od 78.160,00 KM,
- Izgradnja vodovoda D. Moštre, u iznosu od 48.531,05 KM,
- Izgradnja vodovoda Tušnjici, u iznosu od 6.230,00 KM,
- Izgradnja kanalizacije Kula-Banjer, u iznosu od 19.291,00 KM,